

8.14.6

*Idem A. Quinto.*

In summa debiti computabitur etiam id, quod propter possessiones pignori datas ad collationem viarum muniendarum vel quod aliud necessarium obsequium praestitisse creditorem constiterit.

*PP. III k. Aug. Antonino A. IIII et Balbino cons.* [a. 213]

8.14.7

*Imp. Gordianus A. Marciano.*

Usucapio pignoris conventionem non extinguit.

*PP. non. Sept. Pio et Pontiano cons.* [a. 238]

8.14.8

*Idem A. Festo.*

Quamvis personali actione expertus adversus reum vel fideiussores seu mandatores eius feceris condemnationem, pignoris tamen adhuc habes persecutionem.

*PP. id. Mart. Gordiano A. et Aviola cons.* [a. 239]

8.14.9

*Idem A. Attico.*

Si dominium eius possessionis, quae cum pignori data esset, a debitrice donatu ad te translatus est, eamque postea creditor vel eius heredes detinere coeperunt, vindica eam, praeside provinciae curante, ut, fructuum deducta ratione residuoque a te oblato si fuerit satisfactum, ea possessio tibi reddatur.

*PP. III k. Oct. Gordiano A. et Aviola cons.* [a. 239]

8.14.10

*Imp. Diocletianus et Maximianus AA. Alexandro.*

Debitorum praesentes prius denuntiationibus conveniendi sunt, igitur si conventi debito satis non fecerint, persequenti tibi pignora seu hypothecas, quas instrumento specialiter comprehensas esse dicis, competentibus actionibus rector provinciae auctoritatis suae auxilium impertire non dubitabit.

*D. XVIII k. Febr. ipsis IIII et III AA. cons.* [a. 290]